

**Najib Tiba Di Sabah Untuk Lawatan Kerja Dua Hari
Bernama
23 April, 2013**

KOTA KINABALU, 23 April (Bernama) -- Perdana Menteri Datuk Seri Najib Tun Razak tiba di sini hari ini untuk lawatan kerja dua hari di Sabah.

Pesawat khas yang membawa perdana menteri dan isteri Datin Seri Rosmah Mansor mendarat di Terminal 2, Lapangan Terbang Antarabangsa Kota Kinabalu pada 10.55 pagi.

Turut berada di lapangan terbang untuk menyambut ketibaan perdana menteri ialah Ketua Menteri Sabah Datuk Seri Musa Aman dan isteri Datin Seri Faridah Tussin serta barisan pimpinan parti komponen Barisan Nasional (BN) negeri.

Sejurus tiba, beliau berlepas ke Kuala Penyu menaiki helikopter untuk merasmikan Program Yayasan Sabah bersama rakyat di padang Pekan Kuala Penyu sebelum bertolak ke Papar pada sebelah petang.

Najib dijadual menghadiri majlis bersama rakyat di Pekan Bongawan, Papar sebelum bergerak menghadiri majlis bersama rakyat di Dewan Datuk Musbah, Taun Gusi, Kota Belud.

Malam ini, Najib akan menghadiri majlis makan malam Gabungan Persatuan Cina Sabah di Dewan Hakka, di sini.

Jadual lawatan kerja Najib yang juga Pengerusi BN Nasional pada Rabu juga padat dengan menghadiri tiga majlis bersama rakyat di daerah berbeza.

Pada sebelah pagi, beliau dijadual menghadiri majlis bersama rakyat di Padang Pekan Tenom sebelum ke Kompleks Sukan Keningau dan ke Dewan Masyarakat Ranau pada sebelah petang.

Perdana Menteri dijadual pulang ke Kuala Lumpur pada pukul 5 petang Rabu.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=944388>